

Date – 20/09/2025
Time - 07:30 -07:40Hrs
AKASHVANI AIZAWL

REGIONAL NEWS BULLETIN

HEADLINES (MORNING)

1. Mizoram Sawrkar Flagship Program 'Bana Kaih Scheme Phase II' chu nimin khan tlangzarh a ni.
2. Mizoram Sawrkar in GST chhiah tam zawk a lak theih nan chhiah khawn dan tur zau zawk leh tha zawk a dap mek.
3. India chuan khawvela firfiaka chetna leh a kaihhnawih zawng zawng ti bo turin nasa zawka tan lak a tul a ti.
4. Prime Minister Narendra Modia chuan vawiin hian Gujarat-a Samudra se Samriddhi a hmanpui dawn.

<><><>

BANA KAIH

Mizoram Sawrkar Flagship Program 'Bana Kaih Scheme Phase II' chu nimin khan Adviser to Chief Minister, Mizoram State Policy Coordination Committee Vice Chairman Dr. KC Lalmalsawmzauvan a tlangzarh.

Dr. KC Lalmalsawmzauva chuan Mizoram Sawrkar Flagship Program 'Bana Kaih Scheme Phase -II' hnuaia ah hian khawpuia cheng, thiamna leh theihna neisa, bultan tumte leh hmalak tawhna tih changtlun tumte kaih chhuahna tur Loan Component-a awm bakah, kuthnathawktute kaih chhuahna tur 'Market Handholding Support' a awm bawk avangin, mi taima leh tumruhte tan ram tih hmasawna tura hmanraw tangkai tak a ni dawn a ti a. Bana Kaih Scheme hnuaia Loan Component leh Chief Minister's Special Package-te hi a thlawna sem a nih loh thu sawiin, hnathawk tura inpeih te, theihna leh thiamna nei te, ram tih hmasawna tura Sawrkar thawhpui tlaka ngaih te hnena tanpuina a nih thu a sawi.

Dr. KC Lalmalsawmzauva chuan Bana Kaih Scheme chu, a pung Sawrkarin a rulhpui tura loan pek chhuah leh kuthnathawktute thlai thar lei sak mai bakah hmasawna tak chang tura taimakna, tumruhna leh rinawmna nei tura inzirtirna (Moral Reforms) te, sum enkawl dan tha (Financial Literacy) inzirtirna te, Internet hman tangkai inzirtirna (IT Literacy) te leh eizawna rintlak dinna tur ruhrel tha siam te a ken tel thu a tarlang a. Tanpuina dawngten hlawhtlinna an chan ngei theihna turin, an hmalakna kalpui dan en zui tur, 'Monitoring Team' ten uluk takin an vil zui zel tur thu a sawi.

MSPCC Vice Chairman chuan Phase -I kalpui chhung khan kuthnathawktute hmalakna a zarah, buaipui tham Sawhthing thar chhuah a ni chu hmasawna entirna a ni tih sawiin, Sawhthing lei nan cheng Vbc. 95leh nuai 63 pek chhuah a nih thu a tarlang a. Thlai thar chhuahte man man zawka tih ral a nih theih nan rel lo lutte pawh hman tangkai a pawimawh thu a sawi.

P&PI Department Secy Pu Lalmalsawma Pachuau tarlan danin Bana Kaih Scheme Phase -I kalpui chhung khan Loan Component dilna 11,439 dawn atangin 702 chu loan dawng tura pawm a nih tawha. Heng loan pek tura pawm tawh zawng zawng belh khawm hi Vbc. 76 leh nuai35 niin chawhrualin mi pakhat hnenah loan hi Cheng nuai 10 sing 8 sang 7 ang zela pek chhuah tur a ni. An dilna bank azirin tunah hian loan hi sem chhuah mek a ni a, Phase-I ah khan Chief Minister's Special Package diltu mi 29,571 zinga mi 2,258 te hnenah pek a ni.

<><><>

POWER

Power & Electricity Minister Pu F Rodinglana hovin, nimin khan a pisaah Power Supply Load Shedding kalpui thin dan leh hemi kaihhnawih Central Electricity Regulatory Commission (Ancillary Services) 2022 kalpui dan tur sawi hovin thutkhawm a ni a. Pu TBC Lalvenchhunga, Adviser to CM (Finance), P&E Department Official-te, Law & Judicial Department leh Finance Department aiawhte an tel a ni.

He thutkhawm ah hian load shedding kalpui a ngaih chhan tarlan niin, Mizoramin power a hmuhna pui ber Tuirial Hydel Power Station atanga power lakna, 132kV line ah harsatna a awm changin power mamawh phuhru turin hmun dang atangin ruahman (schedule) sa ni lo power lak luh ‘overdraw’ a ngaih thin thu tarlan a ni a. Overdrawal, ruahman sa ni lo atanga lak hi tih a nih loh chuan power mamawh zat kan hmuh theih loh avangin load shedding kalpui a ngai ta thin, tih sawi a ni. Tuirial Hydel Power atanga kawlpheha lakna line dang, Tuirial 2nd Evacuation Line siam mek ni mah se, zawh a la nih loh avangin harsatna hi a awm phah ta thin tih thu meeting-ah hian tarlan a ni.

Thutkhawmah hian State chhunga tharchhuah ngei power hmanga intodelh a tul zia tarlan niin chumi atan chuan Mizoram Sawrkarin Hydel Project thar a buaipui mek Megawatt 132 tharchhuak thei tur Tuivai Hydel Project pawh nasa zawka bawhzui tura rel a ni. Tuivai Hydel Project hi a tirah Public-Private-Partnership (PPP) mode a tih tum ni mahse Mizoram Sawrkar ta liau liau a nih theih nan a tul anga bawhzui tura rel a ni.

Thutkhawm chuan CERC(Ancillary Services) Regulation 2022 chu a taka hmang turin zau zawka inrawn khawmna neih a, uluk zawka ngaihtuah leh atan a rel a. Heng harsatna awm theite hrechiang a, dawhthei taka Sorkar hmalakna ngaichang turin mipuite a ngen nghal bawk a ni.

<><><>

GST

Mizoram Sawrkar in GST chhiah tam zawk a lak theih nana chhiah khawn dan tur thlirin nimin khan Mizoram Resource Mobilization Committee (MRMC) Vice Chairman Pu Haukhuma Hauzel, IAS (Rtd) hovin Taxation Department leh Aizawl City Local Council Association hotute te an thukhawm a,

Thutkhawmna ah hian Aizawl khawpui chhunga dawrkai tam zawk ten Sawkara GST an pek theihna turin Local Council Association te nen hian thawhdun theih dan tur an ngaihtuah a ni.

Kan corr report lo ngaithla ang.

GST danah chuan sumdawngin kum khata a hralh chhuah cheng nuai 20 a tlin chuan GST registration a nei ngei tur a ni. Hemi dan ang chuan dawrkai/sumdawngin thla khat ah cheng nuai 1 sing 7 sang 5 a hmuh chuan a in register ngei tur a nih laiin Aizawl leh Mizoram khawlian deuh deuha sumdawng, an sum lakluh te danin a tuk thleng pha si mahse GST pek duh loh emaw chhan dang avanga in register duhlo engemaw zat awma rin a ni a, heng te hi Taxation Department leh Local Council hotute tangruala hriatchhuah theih dan tur te sawiho a ni. He thawhdunna hi puitlin theih a nih chuan tun aia tam zawk Mizoram Sawrkar hian GST a lakluh beisei a ni.

MRMC in a lo rel tawh angin Taxation Department pawh thuam that mek a ni a. Mizoram Resource Mobilization Committee (MRMC) hi Mizoram Sawrkar in tax leh non-tax revenue a lak a pun theihna tura din a ni a, he Committee hian rawtna hrang hrang siam in hma a la mek a ni.

<><><>

CHAMPHAI

Champhai leh East Tuipui bial inkara darkar 6 vel kawngpui dang chattu, hmun thuma leimin te thenfai a nih hnuah nizan zan rei tawhah khan khualzin ten an mahni khaw lam an pan thei a.

Champhaia Mizoram PWD hotute hnen atanga thu dawn danin nimin chhun a ruah sur nasa avang khan Champhai leh East Tuipui bial thlunzawmtu kawngpui awmchhun, Champhai to N.Vanlaiphai State Highway chu Champhai atanga KM 24 vela hla ah te, Dilkawn leh Kelkang inkarah te bakah Dilkawn leh Khuangleng inkar ah te, hmun thum laiah leiminin kawngpui hi a hnawh a, East Tuipui bial lama hawng tur leh Champhai pana hawng tur lirthei thahnem tak leimin hian a dang a ni.

East Tuipui biala hawng tur, Leimin in a dan khualzin tangkhang mi 300 vel chu Dilkawn VC leh YMA ten zanriah buatsaih sakín nizan dar 9:00 vel khan kawngpui hnawhtu leimin te hi Champhai atanga JCB an tirh pheí chuan a thianfai a, darkar 6 zet leimin in a dan hnuah khualzin te hian nizan zan rei tawhah khan an mahni khaw lam an pan thei ta a ni.

<><><>

SWASTH NARI

Sorkar laipui hmalaknaa Hmeichhe hriselna, Empowered Family Campaign Swasth Nari, Sashakt Parivar Abhiyan hawn pahin nimin khan Khawzawlah Indian Medical Association bultumin Multi Speciality Clinic hawn a ni.

He hun hawngtu Khawzawl DC Pu K. Vanlalthiana chuan Prime Minister Pu Narendra Modi piancham vawi 75-na pualin Swasth Nari, Sashakt Parivar Abhiyan chu September ni 17 atanga October ni 2 thleng India ram

puma neih tur a nih angin Khawzawlah pawh hman a ni dawn tih a sawi a, hmeichhia leh naupangte hriselna atana hmasawnna a nih ngei a rin tlat thu a sawi. He clinic hian mipuite tan damna leh hriselna a thlen ngei a beisei thu a sawi.

Multi Speciality Clinic hawnna hun hi IMA Project & Programme Wing Convener, Dr. Lalhmuchhuaka'n a kaihruai a, hmun hrang hrang atangin doctor 54 an kal a - Synod Hospital te, sawrkar hospital te, private hospital atanga te a kal an ni. Thiamna hrang hrang department 15 an lo kal a, Champhai leh Lunglei doctor te an tel a ni. He hunah hian doctor te'n damlo an chawh tur damdawi chu Tuichang bialtu MLA Pu W. Chhuanawma'n a tumsak a, a bak senso IMA, MGDA, Civil Hospital, ZFDA leh mimal thahnem ngaiten an thawhkhawm a ni. Ultrasound, endoscopy khawl te kengin, blood test leh biopsy te pawh a thlawna tih a ni. MSACS lamin HIV & STI Screening an nei bawk.

RIPANS ten sorkar laipui hmalaknaa Hmeichhe hriselna, Empowered Family Campaign-Swasth Nari Sashakt Parivar Abhiyaan puala Zemabawk Corps Conference Hall-a an buatsaih pawh kalpui chhunzawm zel a ni.

Ministry of Health and Family Welfare leh Ministry for Development of Women and Child hnuaia hmalakna, Swasth Nari Sashakt Parivar Abhiyaan puala Regional Institute of Paramedical and Nursing Sciences (RIPANS) ten hun an buatsaih hi tunkar nilaini khan Health Minister Pi Lalrinpuii'n a hawng a, he hunah hian zirlai leh zirtirtute'n mipuite hriselna endikna camp hrang hrang 10 an buatsaih a, mipui hriselna an endik bakah ei leh in tur tha leh hrisel chungchang an zirtir a, a bikin hmeichhaiate an taksa bakah an rilru a hrisel theihnana an inenkawl dan tur an zirtir bawk a, Campaign hian thla thar October ni 2 thleng a awh dawn a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

CARGO TRAIN

Sairang Rel Station ah nimin atang khan bungraw phur rel an rawn thleng a, Cement thahnem tak an rawn phur thleng a ni.

Kan corr thudawn danin rel hian bungraw hrang hrang tam tham tak a rawn phur a, vawiin khan Cement an rawn phurh thlen chu Zo Rit Phur Association Sairang Branch member 40 rualin an thiarchhuak a, bungraw tam tak a thlen avangin an indaihlo hle nia thudawn a ni.

Kan corr report lo ngaithla ang.

Prime Minister Narendra Modi an tun thla ni 13-a a hawn tak Sairang-Bairabi rel kawnga rel a service hnuah hian Guwahati, Kolkata leh Delhi thleng tur mihrinbg phur rel a service nghal a, Union Railways Minister Aishwini

Vaishnaw chuan rel kawng hawn takah bungraw phur a tlan nghal dawn tih alo sawi tawh a, Union Railways Minister chuan Bungraw phur rel lut turah refrigerated coach pawh a awm dawn thu sawiin, hengah te hian Mizoram thlai leh pangpar thar te a thawnchhuah theih dawn a, hmasawna pawimawh tak Prime Minister Narendra Modi kaihhruaina hnuaia neih thei a ni chu a lawmawm a tih thu a sawi bawk.

<><><>

INDIA ON TERRORISM

India chuan khawvela firfiaka chetna leh a kaihhnawih zawng zawng ti bo turin nasa zawka tan lak a tul a ti. Tunhnaia Pakistan-a firfiakte video darh chungchang sawiin MEA thupuangtu Randhir Jaiswal chuan khawvelin Pakistan ram leh firfiakte inthlunzawm dan an hre vek tawh a ti a. Hetiang video hmuh a awm hian a ti Chiang a ni a ti a. Pu Jaiswala chuan ramri kana firfiaka chetna leh a kaihhnawih tinrengte nuaibo a hun tawh thu a sawi a. Ram intelkhawmna hrang hrang BRICS, SCO leh hmundangah te firfiakte do tura thawhhona tha tak a awm thu sawiin ramri kana firfiaka chetna pawh sawilan fo a nih thu a sawi a ni.

<><><>

PM

Prime Minister Narendra Modia chuan vawin hian Gujarat-a Samudra se Samriddhi a hmanpui dawn. Hei bakah hian hmasawna hnathawh hrang hrang cheng vaibelchhe sing 3 sang 4 leh 200 hu Bhavnagar atangin a hawng dawn a ni. Thlawhna atangin Dholera a thlirkual dawn bawk a. Lothal-a National Maritime Heritage Complex a tlawh ang a, review meeting a neihpui dawn bawk a ni.

<><><>

SEVA PARV

Mipui rawngbawl leh sawrkar inrelbawlna tha thupaia neiin Prime Minister Narendra Modia hnuaiah ramchhungah hmasawna tam tak thlen mek a ni. Tun tum Seva Parv hunah chuan ramchhunga hmeichhe naupangte dikna chanvo leh zahawmna hum tura Beti Bacho Beti Padhao campaign hmanga hmalakna te tarlang ila. January ni 22,2015 khan Prime Minister Narendra Modia chuan Beti Bachao-Beti Padhao scheme hi a hawng a. Ramchhunga fanu zawng zawngte tan hmasawna leh an zahawmna humhim tura hmalakna a ni a. Child Sex ratio te, mipa leh hmeichhe inthliarna ti bo tur leh zirna, eizawna leh thildanga hmeichhiate an dinkhawchhuah ve theihna turin Pu Modia chuan he scheme hi a hawng a. Ram hmasawnaah hmeichhiaten mipate ang bawka tha an thawh ve theihna turin theihtawp chhuah a ni a. PM Modia hnuaiah sawrkar laipua Ministry hrang hrangten he hmachhawp tihlawhtling tur hian an thawk mek a ni.

<><><>

GST

Prime Minister Narendra Modia'n kumin Independence Day lawmnah GST chhuan thar hman a nih tur thu a puang a. Hei hi tun thla ni 3 a GST Council thukhawm chuan a taka rawn ti puitlingin chhiah lak dan chhawng li ni thin chu chhawng hnihah titlemin awlsam zawkin a rawn siam danglam a. GST zaa 5, 12, 18 leh 28 a lak thin chu zaa 5 leh 18 ah tihhniam a ni a. Mi naran leh mi nawlpuite tana hlawkna thlen thei tur berin he GST hi siamrem a ni.

GST tharah hian mi naranten an mamawh lirtheite man tlawm zawkin an lei thei dawn a. Lirthei tenau zawkah te sawrkar chuan chhiah zaa 28 lak thin chu zaa 18 in a tihniam a. Mi 10 aia tam chuan theihna bus ah te zaa 18 atangin zaa 10 ah tihniam a ni bawk.Tamil Nadu-a khawsa SVK Vinodh chuan GST tihhniam anih avang hian mi naran ten anmahni puala lirthei lei an lo nghahlelh em em thin chu a takin a thleng thei dawn a ni a ti.

<><><>